

PRAVILNIK

O NAČINU PROVOĐENJA ELEKTRONSKOG NADZORA

Član 1.

Ovim pravilnikom, u skladu sa odredbama Krivičnog zakona Federacije Bosne i Hercegovine ("Službene novine Federacije BiH", br. 36/03, 37/03, 21/04, 18/05, 42/10 i 42/11) i Zakona o izvršenju krivičnih sankcija u Federaciji Bosne i Hercegovine ("Službene novine Federacije BiH", br. 44/98, 42/99, 12/09 i 42/11, u daljem tekstu: Zakon o izvršenju sankcija), uređuje se način provođenja elektronskog nadzora prema osuđenim licima koja su upućena na izdržavanje kućnog zatvora sa elektronskim nadzorom, osuđenim licima koja koriste vanzavodske pogodnosti i osuđenim licima koja se otpuštaju na uvjetni otpust, kao i druga pitanja od značaja za način provođenja elektronskog nadzora.

Član 2.

Elektronski nadzor izvršava se na način koji osuđenom licu i njegovoj porodici jamči poštivanje ljudskog dostojanstva i osnovnih ljudskih prava i sloboda.

Član 3.

Nadležni sud, u skladu sa članom 23. Zakona o izvršenju sankcija, odlučuje o određivanju izvršenja kućnog zatvora sa elektronskim nadzorom, a nakon ispitivanja tehničkih mogućnosti za takvo izvršenje.

Nadležna ustanova za izvršenje krivičnih sankcija (u daljem tekstu: ustanova) provodi radnje elektronskog nadzora u skladu sa odredbama Zakona o izvršenju sankcija i odredbama ovog pravilnika.

Komisija za uvjetni otpust (u daljem tekstu: Komisija) provodi aktivnosti vezano za elektronski nadzor u skladu sa odredbama Zakona o izvršenju sankcija i odredbama ovog pravilnika, a poslovnikom o svome radu bliže određuje način provođenja nadzora nad osuđenim licem koje je elektronski nadzirano.

Član 4.

Postavljanje i uklanjanje opreme za elektronski nadzor vrši ovlašteno stručno lice nadležne ustanove.

Nadležna ustanova, u smislu odredaba ovog pravilnika, je ustanova:

- koja se nalazi na teritoriji na kojoj se nalazi prostorija u kojoj osuđeno lice stanuje i u kojoj se izvršava kazna kućnog zatvora sa elektronskim nadzorom;
- iz koje se osuđeno lice pušta na korištenje vanzavodskih pogodnosti i
- iz koje se osuđeno lice pušta na uvjetni otpust.

Član 5.

Prilikom postavljanja opreme, zapisnički će se konstatovati ispravnost opreme kao i ispunjenost drugih uvjeta potrebnih za elektronski nadzor.

Ukoliko su ispunjeni svi uvjeti za elektronski nadzor, u zapisniku će se konstatovati početak elektronskog nadzora.

Na dan završetka elektronskog nadzora, lica iz stava 1. ovog člana će ukloniti opremu za elektronski nadzor i u zapisniku konstatovati završetak elektronskog nadzora.

Član 6.

U matičnu knjigu se upisuju i osuđena lica koja izdržavaju kućni zatvor sa elektronskim nadzorom i za njih se formira lični list.

Kako bi se formirao lični list za osuđeno lice koje izdržava kućni zatvor sa elektronskim nadzorom, osuđeno lice će biti pozvano da se javi u ustanovu prije započinjanja izvršenja kazne.

Osuđeno lice ima pravo prigovora direktoru ustanove vezano za podatke u ličnom listu.

Ovlašteno lice ustanove je dužno prigovore zabilježiti u lični list osuđenog lica i dostaviti ih direktoru ustanove.

U roku od osam dana od prijema prigovora, direktor ustanove je dužan utvrditi opravdanost prigovora, a u daljem roku od tri dana dužan je preduzeti mjere za otklanjanje opravdanih razloga prigovora ukoliko se oni ustanove.

Član 7.

Osuđeno lice nad kojim se izvršava kućni zatvor sa elektronskim nadzorom ne smije napustiti prostorije u kojima stanuje ili odsustrovati iz tih prostorija, ukoliko to nije određeno odlukom nadležnog suda na

osnovu koje se izvršava kazna ili odlukom nadležne ustanove za izvršenje krivičnih sankcija.

Pod prostorijama u kojima osuđeno lice stanuje, u smislu ovog pravilnika, smatra se kuća ili stan u kome osuđeno lice ima prebivalište, bez obzira da li je vlasnik te kuće ili stana.

Ukoliko osuđeno lice nema prebivalište, pod prostorijama u kojima osuđeno lice stanuje smatra se kuća ili stan u kome osuđeno lice ima boravište.

Ukoliko osuđeno lice nije vlasnik ili nosilac stanarskog prava na kući ili stanu u kojima je određeno izvršenje kućnog zatvora sa elektronskim nadzorom, osuđeno lice dužno je pribaviti pismenu saglasnost vlasnika ili nosioca stanarskog prava na kući ili stanu.

Saglasnost iz stava 4. ovog člana mora biti ovjerena kod nadležnog općinskog organa.

Član 8.

Prije nego odredi izvršenje kućnog zatvora sa elektronskim nadzorom, sud će od nadležne ustanove pribaviti sve potrebne podatke o tehničkoj mogućnosti izvršenja kao i druge podatke od značaja za izvršenje.

Ukoliko utvrdi da ne postoje zadovoljavajući tehnički i drugi uvjeti, sud neće odrediti izvršenje kućnog zatvora sa elektronskim nadzorom.

Kada pozove osuđeno lice radi izjašnjenja o pristajanju na izvršenje kućnog zatvora sa elektronskim nadzorom, sud će to lice prethodno upoznati sa pravima i dužnostima u toku izvršenja, načinom na koji može ostvariti svoja prava, posljedicama neurednog izvršavanja ili neizvršavanja i svim drugim uvjetima izvršenja kućnog zatvora sa elektronskim nadzorom.

Član 9.

Postavljanje i uklanjanje opreme za elektronski nadzor vrši ovlašteno stručno lice iz člana 4. stav 1. ovog pravilnika, u mjestu i u vremenu koje je određeno odlukom koju nadležni sud dostavlja ustanovi.

Prilikom postavljanja opreme, ovlašteno stručno lice iz stava 1. ovog člana, u prisustvu osuđenog lica ili članova njegove porodice vrši pregled prostorija u kojima osuđeno lice stanuje.

Ukoliko su ispunjeni svi uvjeti za elektronski nadzor, u zapisniku će se konstatovati početak izvršenja kućnog zatvora sa elektronskim nadzorom.

Na dan završetka izdržavanja kućnog zatvora sa elektronskim nadzorom, ovlašteno stručno lice iz stava 1. ovog člana će ukloniti opremu za elektronski nadzor i u zapisniku konstatovati završetak izdržavanja kućnog zatvora sa elektronskim nadzorom.

Član 10.

O aktiviranju opreme i započinjanju izdržavanja kućnog zatvora sa elektronskim nadzorom, ustanova obaveštava nadležni sud u roku od 24 sata.

O datumu početka, kao i o datumu završetka izdržavanja kazne zatvora sa elektronskim nadzorom ustanova odmah obaveštava nadležni organ unutrašnjih poslova na čijem području osuđeno lice ima prebivalište, odnosno boravište.

Član 11.

Ukoliko osuđeno lice kojem je posebnom odlukom dozvoljeno odsustvovanje iz prostorija u kojima se izvršava kućni zatvor zakasni sa povratkom u te prostorije, ovlašteno lice ustanove će odmah po nastanku kašnjenja izvršiti provjeru razloga kašnjenja.

Ako se radi o opravdanim razlozima kašnjenja, nakon konstatovanog povratka osuđenog lica u prostorije, ovlašteno lice iz stava 1. ovog člana o tome će sačiniti službenu zabilješku i uložiti je u lični list osuđenog lica.

Član 12.

Kada direktor ustanove ocijeni da za to postoje opravdani sigurnosni ili drugi razlozi, može odrediti da će se osuđeno lice koje koristi vanzavodske pogodnosti elektronski nadzirati.

Tehničke pripreme i postavljanje opreme za elektronski nadzor vrši se tri dana prije početka korištenja vanzavodskih pogodnosti.

Član 13.

Ukoliko osuđeno lice koje koristi vanzavodske pogodnosti pod elektronskim nadzorom zakasni sa povratkom u ustanovu, ustanova će odmah po nastanku kašnjenja izvršiti provjeru razloga kašnjenja.

Ako se radi o opravdanim razlozima kašnjenja, nakon konstatovanog povratka osuđenog lica u ustanovu, ovlašteno službeno lice ustanove o tome će sačiniti službenu zabilješku i uložiti je u lični list osuđenog lica.

Član 14.

Ukoliko prekrši odredbe o elektronskom nadzoru osuđeno lice odgovara disciplinski, u skladu sa odredbama Zakona o izvršenju sankcija.

Član 15.

Komisija može odlučiti da će se osuđeno lice koje se otpušta na uvjetni otpust elektronski nadzirati.

Komisija će prilikom donošenja odluke o određivanju elektronskog nadzora odrediti potpune specifikacije o provođenju elektronskog nadzora.

Član 16.

Kada direktor ustanove primi rješenje Komisije o uvjetnom otpustu osuđenog lica koje će se elektronski nadzirati, dužan je preuzeti potrebne radnje kako bi se elektronski nadzor mogao provesti.

Tehničke pripreme i postavljanje opreme za elektronski nadzor vrši se tri dana prije početka uvjetnog otpusta.

Član 17.

Ukoliko se za vrijeme izvršavanja kućnog zatvora sa elektronskim nadzorom ili korištenja vanzavodskih pogodnosti sa elektronskim nadzorom ili uvjetnog otpusta sa elektronskim nadzorom pojave problemi tehničke prirode, ustanova će bez odlaganja otkloniti nedostatke, kako bi se izvršenje moglo nesmetano nastaviti.

O tehničkoj poteškoći, njenom otklanjanju i drugim važnim podacima, ustanova će sačiniti službenu zabilješku, koja čini sastavni dio predmeta koji se vodi za svako osuđeno lice pojedinačno.

Osuđeno lice koje je pod elektronskim nadzorom će bez odlaganja obavijestiti ustanovu o uočenim tehničkim problemima za vrijeme nadzora.

Član 18.

Ovaj pravilnik stupa na snagu osmog dana od dana objavljivanja u "Službenim novinama Federacije BiH".